

四庫全書

集部

欽定四庫全書

集部

宋百家詩存卷五

詳校官鹽察御史_臣孫家賢

主事銜_臣徐以坤覆勘

總校官庶吉士_臣倉聖脉

校對官中書_臣方大川

謄錄監生_臣汪承泰

欽定四庫全書

宋百家詩存卷五

嘉善曹庭棟編

傅家集

司馬光字君實夏縣人以父蔭入官年二十登寶元
初進士龐籍薦除館閣校理英宗朝進龍圖閣直學
士神宗朝加資政殿學士退居洛陽凡十五年田夫
野老皆知為司馬相公自稱迂叟著迂書四十一篇

元祐元年拜尚書左僕射是年九月薨年六十八賜諡文正光歷事四朝公忠直亮不顧時忌徽宗初蔡京議光入奸黨碑令石工安民鐫字辭曰民愚不知立碑之意但如司馬相公謂之奸邪民不忍刻也怒欲加罪泣曰被役不敢辭乞免鐫安民二字於石末恐得罪於後世聞者愧之建炎中配饗哲宗廟文集八十卷自為編次以授子康康歿晁以道得而藏之中更禁銅南渡後謝克家劉嶠始鏤版以傳焉

重經車輞谷

昔年道經車輞谷直上七里鹽南坡今年行役復到此
方春流汗如翻波中塗太息坐磐石涕泗不覺雙滂沱
我生微尚在丘壑強若麋鹿嬰虞羅人踰三十只有老
後時過此知如何雲泉佳處須速去登山筋力行蹉跎
送守哲歸廬山

哲公金陵來神韻自孤秀京華三十春高節愈幽茂烜
赫公卿門道俗日奔走自非趣尚合一息不相就慷慨

賢豪士波溢千金富蔬飯苟有餘秋毫未嘗受蹏呶

音罵

錢宣譁也

不可變堅白如瓊璫居然尚愁寂終厭塵土臭忽

思香爐雲蒼蔚冠孤岫振衣尋昔遊煙霞宛如舊絡木

藤蔓長攬

音雙爪持也

石松根瘳瀑泉響夜壑乳管添春竇

茅茨蔭方丈晏坐度清晝几席雨竒花階除馴猛獸方

知物外樂回視人寰陋慎勿露聲光愚迷將輻輳

瘿盆

瘿盆生以醜自需突兀當軒聳羣目海鼃鬪怒腹幹張

老蛟蟠蟄鱗鬚禿昔時仙客浮孤查波痕漬朽成凹窪
蜀都賣卜置之去爾來流落嚴遵家誰逢好事得寶蓄
裁供盥濯真可辱況為飲具承歡娛未必蟠根勝珠玉
不若剗為太古尊音滿斟音居明水羞百神凶桴葦籥薦忠
信坐使風俗還深淳

奉同何濟川迎吏未至秋暑方劇呈同舍

穉金避老火暑勢尤驕盈朱光爍厚地萬葉焦無聲夫
子久倦遊得郡為親榮束裝待騶吏歸期殊未成埃沙

塞廣陌蓬蒿擁前楹出處兩不愜孤坐心煩縈何時驚
飈來埽蕩天地清郊墟草樹疎千騎從雙旌飄飄若神
仙皁蓋西南征離羣詎幾時豈不懷友生有意肯相過
不妨巾屨并官舍稍虛涼愧無穀酒迎

昔別贈宋復古張景淳

昔別如飛蓬飄蕩隨所適那知十六載卮酒對今夕渺
然思舊遊間不容一息百年詎幾何會合難屢得復古
素愷悌志行重金錫皎如百鍊精不為燥濕易景淳氣

高逸浩蕩誰與敵下筆驚雷霆龍蛇走屋壁居然器業
美但有富貴逼他時綰金印羈束愈愁寂須窮今日懽
快意浮大白勿辭簪弁傾頽然倒尊席

投梅聖俞

聖俞精為詩堅重比白玉至寶識之希未必諧衆目應
辰仰高風跂聳自西蜀平生未相識歉歉不自足薄遊
困京師旅食止脫粟得官當入秦行李未結束先求聖
俞門執贄請所欲九衢季冬月風沙正慘黯羸馬憚遠

行毛鬣寒瑟縮旅拒不肯前一步九刺感飢童袖擁口
手足盡皸瘃論詩久未出竊罵怨滿腹歸來面揚揚氣
若飫梁肉累累數十字疎澹不滿幅自謂獲至珍呼兒
謹藏蓄長安十五驛重複間川陸置詩懷袖間勸懣輒
披讀高吟桑野闊日暝即投宿自可忘羈愁行瞻灞陵
曲

晚歸書室呈錢君倚

簿領日沈迷事役等胥靡得歸無所為未免閱書史一

種勞精神胸中異憂喜人生無苦樂適意即為美迺知
抱關人不必羨青紫

同錢君倚過梅聖俞

王畿天下樞簿領日填積自非奉朝請九衢未嘗識今
茲到東城胥靡暫逃役近指聖俞居安能不往覲一室
靜蕭然昏碑貼古壁叩階讀新詩迷闇得指摘笑言殊
未足黥然日將夕呼馬涉歸塗燈火已歷歷又知幾何
時更有重來跡

和始平公夢中有懷歸之念作詩始得兩句而
寤因足成一章

元宰撫洪鈞四海可熏灼至人養天真視此猶嬰縛出
入金鼓威寤寐琴尊樂迺知伊吕心未始忘丘壑

齊山詩呈王學士

哲字微之

江上有奇山羣峰矗如翦昔聞齊刺史置酒升絕巘其
人有惠政嘉名自茲遠君來踵其跡詞牒日清簡驪駒
時入谷勝地窮搜選問俗復懷人非徒事遊衍

朝雞贈王樂道

小雞距短雙翅垂廣場勇鬪無所施清曉長鳴獨先衆
朝者恃此能知時星河滿天月光白東望扶桑悄無色
一聲高舉耳目醒四遠羣陰俱辟易陋巷人疎煙火稀
永夜沈沈鐘鼓微聞之徐起就盥櫛顛倒不復憂裳衣
君家迴居北城曲阿閣嵯嶢日鳴玉瀟瀟風雨得司晨
不復無功啄君粟

夏夜

溽暑鬱不開
轟轟雲萬疊
長風卷地來
凍雨不需葉
雖無潤物功
涼冷得所愜
須臾號怒息
清月照壁頰
小冠簪短髮
衣裾輕獵獵
敬傾依曲几
暫爾蘇疲繭
坐久不思眠
草間微露浥

和王介甫巫山高

巫山高巫山之高高不極
寒江西來曳練長
羣峰森羅十二戟
清猗悲號裂翠崖
老蛟怒鬬摧丹壁
輕生重利三巴客
一葉直衝高浪白
船頭吟嘯坐自如
仰視長天

不盈尺叢祠像設儼山椒巫祝紛紛非一朝云是高唐
神女之所處至今暮雨常瀟瀟我聞神理明且直興亡
唯觀惡與德安肯來從楚國君憑依夢寐為淫昏襄王
之心自荒惑引領日望陽臺雲獨不思懷王西行不復
返甲光照地屯秦軍蠶食黔中下荆門陵園宗廟皆燒
焚社稷飄零不復存嗟嗟若敖蚡冒筭路藍縷空辛勤
昔予嘗權宰韋城今重過之二十五年矣慨然
有感

二十五年南北走遺愛寂然民記否昔日嬰兒今壯夫
昔日壯夫今老叟

贈道士陳景元酒

籬根委餘菊階角擁殘葉清言久不挹何以慰疲繭朋
尊涵太和高興雅所愜誰云居室遠風味自可接

邵不疑廳薜荔及竹

脩竹非俗物薜荔亦嘉草樹之君子庭人來見逾好侵
階鶴脰細緣壁龍鱗老紛披兩踈翠煙色宜秋蚤主人

日封植清風庶長保

澹樹石屏

昔行輦洛間馬瘦天復陰寒煙澹不收一拂橫長林當
時無畫工負此清賞心今朝石上跡歷歷皆可尋輕素
已紛泊老幹仍蕭森坐令高興還野氣生衣襟丹青不
耐久風日易消侵何如造化真更彼歲月深昌言家素
貧購此糜百金請鐫好事名千古無消沈

白鵲圖

白鵲日邊來一息萬里遙橫飛碧海晴六翮寒蕭蕭輕
如朔雪花迴與長風飄傾身疊紺爪吟嘯何哮噤瞥來
疾驚電歛起先扶搖遂令狐與狸不敢矜凶妖爵羅不
可取滅影還雲霄世人莫得見粉繪圖輕綃凜然堂牖
間霜氣生春朝風雨夜如墨古木無鳴鳥

柏軒

凜然凌霜色本自生丘壑徙之君子庭栽培固不薄靜
夜聲颼颼清晝陰漠漠秀氣逼檐楹翠影通簾箔知君

梁棟材大匠偶未度但守歲寒心閒軒亦不惡

山齋

幽蹊入桃李危棧蟠林麓行行忽虛敞高齋出山腹園
圃近指掌郊郭紛盈目春老茶蘼香夏淺篋簾綠條橫
喜冒衣筍迸乍穿屋秋江澄可卷冬嶺翠如撲煙間漁
艇小塞外邨居獨燒轉望畬田響答聆伐木驚麕挺走
險鳴禽嚶出谷物華時變更興趣日相續誰知使者尊
常著野人服肯以駟馬榮區區詫鄉族

會景亭

景物浩無窮，茲為一都會之人心。
若鑑萬狀盡相對，喬林擁砌底。
脩嶺倚窗背，流雲過席上去。
鳥出天外徐徐，杖履征藹藹。
郊原晦來往，亦何為逍遙真樂內。

噴玉泉

蒼崖雙起秋雲齊，亂峰迸出如攢犀。
石棱澀不容馬蹄，下馬步入荆榛蹊。
瀑泉沃雪掬白電，落潭橫引成清溪。
老木長藤咫尺迷，興闌欲出忘東西。

神林谷

石下泉聲蔓草深
石上露濃蒼蘚徧
山禽驚起飛且鳴
葉墜空林人不見

八月十五日夜寄友人

故人音信絕對月動相思
清露滴紅葉此懷當告誰
秋風廣陵郭正是望濤時

柳湖

依依煙未歇漠漠風初靜
浮花滿波面不見參差影

華星篇

時視役河上寄
郡中諸同舍

涼風淨埽雲無跡海月未生星歷歷
貝聯珠貫拱北辰
三五縱橫此何夕重樓疊榭出秋空
鵲露寒連桂宮
瑤井迴臨丹闕外玉繩斜挂瑣窗中
征人遠別空閨悄
鐘漏蕭疎天不曉碧紗輾轉無復眠
卧視寒光度華沼
漢家賢將戍臨洮結髮從軍今二毛
誰憐身老心猶壯
深入長占太白高豐城古劍沈淪久
匣中夜半雙龍吼
乃知神物不自藏紫氣依稀見牛斗
有客離居望所親

遙知清夜會荀陳隄繇未息無由去不及浮查河畔人

楊白華

勸君勿嫌楊華太輕薄籬下溝中紛漠漠翠鬟婢子不
勝愁埽盡還飛滿朱閣晚來風雨送行春天無游絲地
無塵雪狂絮亂安可得孤樹青青愁殺人

都下秋懷呈聶之美

愚疎強從仕趣尚與時乖竭來遊京邑榮願知誰諧王
國富英奇氣象標巖崖雲鴻送雙目攀援路可階秋風

轉枯葉颯颯繞寒齋出門無所之飛塵滿天街夫君宦
未達猶得稱吾儕解衣換斗酒且盡平生懷

陪張龍圖南湖暑飲

紅旆紫林卻轉瓊筵就水重開荷香著衣不去竹色映
酒遙來

樓船激濫輕浪鷗鷺繽紛滿天清歌久之未度畫梁塵
落芳筵

舟中夜坐

風柳動蕭疎寒星浸寥落中宵四寂然時有游魚躍
汀沙落席帆岸柳縈單舸小市遠微茫簇水初燈火

野花

喧喧桃李蹊何妨笑幽草但願保天真徐共春風老

和興宗夜直聽雨

茫茫凍雨來入夜勢增急縱橫挾春風飄灑相噴吸敗
窗端見欺遽有萬點入先生伏經編眼冷倍昏澀夜分
童僕倦跛倚厭久立燈火為溟濛詩書亦霑濕夫君儲

善價未售不悵物華迎霽新佳賞時將及困中林幾
何營釀須汲汲

首夏呈諸鄰二章

首夏木陰薄清和自一時筍抽八九尺荷生三四枝新
服裁蟬翼舊扇拂蛛絲莎徑熱未劇晨昏來往宜
蠹燼久旱天颯颯昨宵雨塵頭清過轍水脈生新渚豈
徒滋杞菊亦可望禾黍勿笑盤蔬陋時來一觴舉

酬王安之謝樂栽

洛人栽花不栽藥吾屬好尚何其偏服之雖能已百疾
愛閒成癖無由痊

送藥栽與王安之

盛夏移藥栽及雨方可種為君著屐取呼童執傘送到
時雲已開枝軟葉猶重夕陽宜屢澆又須煩抱甕

小雨

雲日互出沒數朝飛雨清瞳矐似欲止廉纖還未晴映
空輕絲亂著物細珠明葉端危未落荷心重忽傾喜涼

高燕舞便濕羣蛙鳴於予亦有得藥畹胡麻生

和宋復古大雨

積陰連日作鬱蒸長雲飛天勢如鵬白雨四注垂萬絙
坐間斗寒衣可增

雷公推車電施鞭飛騰九澤舞百川須臾開晴萬物鮮
仰視白日當青天

見山臺晝卧偶成

移牀獨上高臺卧颯颯涼風吹面過林蟬忽噪驚薄夢

手執殘書幅巾墮

螢

林塘荒濕地向夕已飛螢月沒蒼吟砌露涼人在庭隨
風疑落燼過水亂疎星學子燈前寢誰將爾照經

不寐

長年睡益少氣耗非神清昨朝多啜茶況以思慮并中
煩枕屢移輾轉何時明蘇秦六國印力取鴻毛輕白圭
萬金產運智立可營如何五更夢百方終不成

九月十一日夜雨宿南園韓秉國寄酒兼見招
以詩謝之

雨多秋草盛濃綠擁寒階吾廬奧且曲退縮如晴蝸小
園已自隘欲往泥霑鞢體羸畏風冷室處門常闔九日
古所重負此時節佳緬想使君宴綺席臨高齋肥豎堆
玉盤飛觴酒如淮楚舞陵湖波茱萸落金釵神醒鼓吹
喧百疊疑傾崖歡餘忽我思牙兵星火差湫泉恥獨醉
醇味相與偕我飲雖不多和氣浩無涯梧子拾為果拒

霜伐為柴沼中數寸魚烹煎足為鮭誰言無以侑繞渚
多鳴蛙交道久衰薄歸然見吾儕奈何數舍逢晤語積
年乖況乃辱嘉招私心豈不懷輾轅石道澀重以陰雲
埋雖有果下馬款段非渥洼臨風徒竦踊志願焉能諧
狂詩寄一笑聊用當詼俳

酬趙少卿

丙字南正

藥園見贈

鄙性苦迂僻有園名獨樂滿城爭種花治地惟種藥栽
培親荷鋤購買屢傾橐縱橫百餘區所識恨不博身病

尚未攻何論療民瘼

登封龐國博

元常字懋德

年二十八自云欲棄官隱

嵩山作吏隱庵於縣寺俾光賦詩勉率塞命

懋德負長才全牛不足剗纔為百里宰驥足殊未展齒
髮方盛強趣尚已高遠結庵職二室志欲巢絕巘賢人
心如雲無跡有舒卷不須驚俗目卓犖乃求顯既知吏
可隱何必遺軒冕

暮春同劉伯壽史誠之飲宋叔達園

絮狂飛作團梅小不多
酸共惜春餘好更窮
今日歡清流入花底
翠嶺出林端嫩筍玉
縈箸新櫻珠照盤
歡迎嘉客易會合
故人難寄語門前
僕驂騶任解鞍

示道人

天覆地載如洪鑪
萬物死生同一塗
其中松柏與龜鶴
得年稍久終摧枯
借令真有蓬萊山
未免亦居天地間
君不見太上老君
頭似雪世人浪說
駐童顏

久雨效樂天體

雨多雖可厭氣涼還可喜欲語口慵開無眠身懶起一榻有餘寬一飯有餘美想彼廟堂人正應憂變理

南園飲罷留宿詰朝呈鮮于子駿范堯夫彝叟兄弟

園僻青春深衣寒積雨闌中宵酒力散卧對滿窓月旁觀萬象寂遠聽羣動絕只疑玉壺冰未足比明潔

不寐

思夢久不效良夜行已闌此心如杯水擾易澄苦難百

年能幾何萬慮誰能殫棄置勿復尋專取形神安

和家兄喜晴用王安之韻

象龍雖得請躍蜥亦須占既有膏苗益寧無漂麥嫌餘
霏方映戶反照忽通簾羈旅愁懷闕農家喜色添田間
拾穗滿陌上荷鋤兼豫想三川迴秋場萬庾尖

病中鮮于子駿見招不往兼呈楚正叔范堯夫

時正叔約
次日為會

衰朽拙自將蘊積成中病掩扉卧小榻安養惟便靜遙

知良友集鬱若荀陳盛獻酬屏浮飾簡率任真性雖無
束帶苦實憚把酒併開囊檢藥物不與尊壘稱筋骸幸
復常他時掃三徑

和鮮于子駿秋意

好風自遠來小雨初濡地雖當朱夏半已有清秋意新
蟬乍孤吟病葉或先墜頓覺愈沈痾暫喜濯炎熾彩筆
動高興瑤徽發幽思賤子獨何為宵涼甘熟寐

坐中呈鮮于子駿范堯夫

微雨雖妨行樂薄寒卻解留花今日且遊小圃明朝更
向誰家

同鮮于子駿題和樂亭

春禽弄晴朝秋蟲吟雨夕風和振蘭芳露寒滋菊色萬
物苟得所隨時各有適矧伊人最靈胡為長慼慼聖人
垂大訓燦爛著芳冊至樂和無聲大禮簡無跡心專守
中庸身不蹈邪僻造次常在前須臾不離側

風林石歌

蔡著作抗字子直
得此石於朱陽山

聞君家有風林石鐫刻無痕畫無跡靡然合勢俱左傾
偃蹇常如負風力置之坐側野意生靜聽若有颼颼聲
忽疑身世在丘壑使我蕭然無俗情黃金白璧豈非好
子直視之不為寶

洛陽少年行

銅駝陌上桃花紅洛陽無處無春風青絲結尾連錢驄
相從射獵北邙東流鞭縱鎬未云畢青山團團載紅日
雲分電散無影跡黃雞未鳴已復出

同范景仁寄修書諸同舍

烈火非不猛不耗百鍊金寒霜非不嚴不彫竹柏林小
人勢利合傾覆無常心君子道德親白首猶視今諸君
閨臺秀相得如璆琳離羣一昔期乃爾動悲吟古風久
已衰交道日頽侵願名思友操播之清徽琴

和端式十題

春塘冰

春塘含薄冰淅瀝隱隈曲晴日射寒芒柔風折哀玉草

樹曾未知波光已先綠

煙際鐘

蒼茫返照收
羃歷寒煙起
前山黯同色
不辨峯巒美
獨有遠來鐘
悠揚翠微裏

汀洲蘋

秋江蘋澹蕩
波急枝難定
參差碧葉繁
皎潔寒花靜
幽人吟不歸
獨立汀洲暝

漁舟火

漁翁繫葉舟遠映楓林宿手攜雙白魚呼兒爨山竹深
夜寂無人明滅寒江曲

寒溪石

穹石正嶄巖寒流更清急霜飛敗葉擁波濺蒼苔濕谿
僧勿劇來沙鶴方孤立

幽谷泉

深谷窅無底空聞泉水哀時因秋日照微見碧縈回谷
裏非人境胡麻何處來

秋原菊

高原向搖落叢菊始滋榮
草際浮金碧照人雙目明
何須天生理玉笋泛餘英

垂崖鞭

山竹引春根垂透蒼崖底
綢直老龍鬚佶屈脩蛇尾
支郎雖畜馬不忍裁為箠

古木陰

古木夏陰薄蕭蕭蠹葉微
豈無綠樹濃愛此風煙安高

僧此休息肩倚瘦筇枝

天外峯

飛鳥去不息長空黯何極疎峯帶夕暉點綴秋天碧禪
觀坐超然相望兩沈寂

和聶之美雞澤官舍詩七首

西齋

明府學既優所聞今得施四境已澄清還以書自怡西
齋幾黃卷治原俱在茲

題廳壁

百里有民社古為子男國苟有愛物心穉老皆蒙德為
身不為人鄙哉陶彭澤

縣樓

孤樓雖不高足以瞰四遠餉婦陌頭歸田夫桑陰飯敕
吏省追胥勿令農事晚

葦

索索夕風迢灤灤朝露裊啁雀嫋寒枝宿螢依敗葉渺

然秋興長坐與江湖接

柳

驛道苦車馬田廬悲斧斤誰栽官舍前老朽完天真所
願明府心庇樹如庇人

向城路

邨路煙欲暝行人殊未稀借問往來者營營皆有為乃
知市朝客趣務良可悲

懷翠亭

高齋對秋山平望殊不遠雖違獨往心蒼蒼長在眼可
嗟都邑遊終日紅塵滿

憶同尋上陽故宮路

上陽門外雲連草車馬遙遙往來道昔王遊豫幾何年
今人豈識當時好明珠翠羽已成塵道上行人幾番老
當時秋天落宮槐今此婆娑皆合抱

秋意呈江鄰幾卿

新涼入閭巷舊暑何人埽筠籠賣紅蓮莎階墜丹棗蕉

衫日以疎紈扇安能好蟬悲西風樹燕亂斜陽草此意
屬淵明籬邊幾尊倒

寒食御筵口號

聖主褒優鼎軸臣金觴玉醴照青春萬家煙火朝來靜
九陌風光雨後新高燕翻飛驚紫綬餘花點綴託朱輪
問牛因得觀民俗不獨嬉遊惜令辰

春祠致齋寄呈范景仁宋次道

比日聚官舍笑言曾未厭暫成揮手別各有侍祠嚴晴

景朝朝麗春容物物添解齋當共醉莫遣此期淹

和王道粹春寒趨館馬上口占

殘臘尚要春清寒更著人雪華猶惜別物意倍添新雲
壓宮城重風調玉漏勻行遊宜結轡九陌未多塵

正月三日與廣淵同出南薰門分趨齋宮塗中
成

並轡出都門蔥蘢日欲昕野寒餘宿雪樹閣濕春雲稍
望郊宮近先愁馬首分一朝猶戀戀可復久離羣

和宋子才郎中孟秋省直

夜久殘暑盡好風來滿襟牀空唯置枕冠小不施簪竹
影亂涼月林梢轉曉參人心有喧寂何必卧雲岑

次韻和江鄰幾九月五日省直

羣騶布路散瘦馬解鞍迴雨闌蟲聲樂秋深菊意催圖
書紛自適僚友邈誰陪何以消寒夜殘醪不滿杯

又和雪

四檐冰管未全晞一夕陰風雪又飛客卧牛衣憂死別

人留玉塞望生歸公車歲晚憐東郭遼海雲深失令威
頗憶當年映書否物華如舊鬢毛非

館宿遇雨懷諸同舍

佳雨濯煩暑翛然生曉涼森沈殿瓦碧羃歷井苔蒼
院靜杉篁秀人閒鐘鼓長憑誰同把酒清興官相望

寒食南宮夜飲

積旬留省署容易度春華芳草踏青晚長楸行樂賒雲
疎時送雨風細暗飛花直有黃金百無因過酒家

和范景仁夜讀試卷

案前官燭墮花頻滿目高文妙入神勇氣先登勢無敵
巧心後發語尤新好賢何帝三熏貴求寶方知百汰真
愚魯自非憑驥髮崑山千里到無因

和趙子輿龍州吏隱堂

四望逶迤萬疊山微通雲棧落塵寰誰知吏道自可隱
未必仙家有此閒酒熟何人能共醉詩成無事復相關
浮生適意即為樂安用腰金鼎鼐間

寄題錢君倚明州重修衆樂亭

橫橋通廢島華宇出荒榛風日逢知己湖山得主人使
君如獨樂衆庶必深輦何以知家給笙歌滿水濱

寄題傅欽之濟源別業

縣郭遙相望脩篁百畝餘林間清濟水門外太行車道
勝隨宜足身閒與世疎何時容命駕采蕨釣肥魚

寄題李水部庠漣水別業

茅茨臨素漣沃野帶長林日永一堂靜草生三逕深消

憂何用酒為樂不須琴擾擾市朝客無人知此心

寄題濟源李少卿章園亭

縣僻人事少土肥風物殊杖刊靈壽木輪裹淖梁蒲竹
不減淇水花仍似洛都主公眉雪白遊覽未嘗扶

遊瀍上劉氏園

日暖孤臺迴露濃幽逕微茅齋舉白飲沙渌踏青歸照
水清滿眼穿林香濕衣莫言春尚淺已有杏花飛

漁父

楚岸橘花香扁舟泛渺茫短蓑衝密雨素髮淨秋霜煙
外鳴榔遠波間擲線長無人識名姓擊楫入滄浪

蚤春

璿霄轉斗車春意逼梅花熟寐侵街鼓閒情到酒家晴
陽浮地末寒色斂天涯歸鴈空餘跡朝來印浦沙

入塞

萬騎入榆關皋蘭苦戰還摧鋒佩刀缺蹋血馬蹄殷鐃
吹來風外牛羊出霧間須知沙塞惡壯士變衰顏

秋日登觀信亭

西風連夜雨草樹已蕭條宿霧稍零落寒山更寂寥
林紅猶帶日岸白欲生潮新鴈來何處離離天際遙

南湖

宋都南野水花柳媚名園鳥起沙留跡魚驚浪結痕
朱橋通別島白路出荒邨城邑雖云邇常無車馬喧

西谿公讌二首

五馬非從樂西城念勸功翠帷低映水紅旂不勝風
葉

脫青山靜雲歸碧落空淹留盡佳興新月漸朦朧

謝守愛山水軍城況不賒魚驚避落葉鳥倦立浮查古
柏依岡遠垂楊帶岸斜秋風吹急管一曲度荷花

和李殿丞倉中對菊

文案漸消散倉閒吏已稀庭空數蝶下夜靜一螢飛愛
賞忽成句淹留時忘歸高情雖不繫遇此獨依依

客思

客思倦漂泊居然感物華關頭望紅葉馬上見黃花薄

宦終無定閒愁詎有涯今朝書至否幾夕夢還家

曉霽

夢覺繁聲絕林光透隙來開門驚鳥鳥餘滴墮蒼苔

觀江上人壁許道寧畫寒林

昔曾驅瘦馬衝雪過滎陽不悟當時景蕭然在此堂

九日登麻蘭坂

客路逢佳節無歡更益愁前山造雲日登陟不因遊

延安道中作

羈旅兼邊思川原蹠血新煙雲長帶雨草樹不知春細
水淘沙骨驚飈轉路塵今朝見烽火白首太平人

和張推官同年師爽春陰無緒偶成

澹泊輕雲寒不收未成春雨只添愁風煙寂寞幾何限
盡入憑高一寸眸

薄寒未去臘纔過春色先知在綠波不是宿雲能作思
大都王粲自情多

鷺鷥

清閒自合無憂累白髮何因更颯然遙望孤飛下秋水
雪花一片落晴天

晚秋洛中思歸東園

不利不名空去國鴈飛葉落未歸來秋風肯待主人至
籬下黃花隨意開

梅花

塞北為君戍江南是妾家遙知關外雪正似嶺頭花

山家

林下脫雙履窓邊挂幅巾閒堂風掩戶斷嶺月窺人

風

隴首紅旌急尊前翠幕重林端翻遠剎花外轉疎鐘夜
寂清機發春闌別意濃如何玉琴韻併欲在青松

和道矩送客汾西邨舍杏花盛開置酒其下

田家繁杏壓枝紅遠勝桃夭與李穠何事偏宜閒處植
無端復向別時逢林間暫繫黃金勒花下聊飛瑪瑙鍾
會待重來醉嘉樹只愁風雨不相容

從始平公城西大閱

滄溟浴日照春臺組練光中玉帳開
汾水騰凌金鼓震西山宛轉旆旌迴
道遙靜散晴空雨叱咤橫飛迴野雷
坐鎮四夷真漢相武侯空復道英才

和樂道自河外南轅過宜芳雨晴氣和景物可
愛馬上偶成

京洛春應老河邊初解顏碧浮煙際草翠滴雨餘山目
極褰帷外詩成攬轡間滿川桃李色共喜傳車還

晨發故關寄逢吉

畫戟衣中趨絳帳驛亭門外拂征鞍已嗟漂泊三年別
更負從容十日歡煖席未窮譚笑樂陟岡相望滯留難
揚鞭策馬幾多意原上秋風作曉寒

病酒呈晉州李八丈

身如五嶺炎蒸裏心似三江高浪中誰道醉鄉風土好
舟車常願不相通

三月晦日登豐州故城

春盡蕪城天一涯
白榆生莢柳生花
滿川戰骨知誰罪
深屬來人戒覆車

寄聶之美

之美時監
韶州錢監

心目悠悠逐去鴻
別來容易四秋風
莫嗟密密書連紙
萬里經年信一通

曉思

束帶朝尚蚤
蓬門未脫扃
短籬潛落月
老樹帶孤星
隱几貂裘黑
開編竹簡青
子雲非執戟
何以得窮經

詩寄雲夫處士老兄兼呈知府待制八丈

一鷄曾飛奏中林下鶴書今乘使君馬重到逸人居松
竹過從久問閭惠愛餘只應棠樹影比舊更扶疎

武城致齋奉酬吳玗卿寺丞太學宿直見寄二
首

廣文更直太常齋咫尺無從盡素懷不及清風得隨意
夜深容易過天街

雪後餘冰尚綴檐月華霜氣入疎簾難堪瓊玉驚心骨

坐覺清寒幾倍添

感興寄聶之美

平生百無可強為一官縻世味偏予薄
心期獨子知林猿愁玉鎖櫪馬患金羈
年事今華髮求榮欲為誰

贈清衍

我厭俗緣苦空為薄宦牽如師真達者
於世亦超然敝笠衝塵陌寒雲擁雪天
崎嶇遠相顧深愧此心專

正月二十四日夜雪

疊瓦浮輕雪參差粉畫難苦欺初變柳故壓未舒蘭夜色微分白春容不受寒即為花卉奪猶得暫供看

酬不疑雪中書懷見寄

校理
邵必

直道免三黜敢云羞小官盤飧紅粟澀衣桁黑貂寒書府容身易侯門曲意難荆扉盈尺雪有客問袁安

酬師道雪夜見寄

玉樹交橫雪後天銀河沈著斗闌干筆鋒微結冰絲澀燈暈初成花燼殘太學先生羶苦薄公車倦客履仍單

欲吟佳句到清曉夜寂愁聞金石寒

和子淵除夜

緹室重飛玉琯灰物華全與斗杓回依依殘臘無情別
歷歷新春滿眼來強取酒卮浮翠柏嬾開粽葉覓楊梅
男兒努力平生志肯使功名落草萊

興宗許菊久之未得

菊裁許送定如何庭下不堪秋草多九日無花更無酒
便攜藜杖直相過

得菊栽并詩

黃花小撥和泥斲野興蕭蕭已相逐同來更得兼詩句
久立看詩忘栽菊

和同舍對菊無酒

黃花倚秋色畦畦為誰開更使窺殘榼空令洗舊杯嗅
香行繚繞撚蕊立徘徊盡日柴門外白衣來不來

和肿卿喜雨偶成

萬里風隨快雨來塵昏消伏旱光開物情濯熱參差喜

天意為仁容易迴，簾映薄寒燈有暈。窓含虛白麝成煤，君侯雅有江湖興。瀟灑何須氣象催。

喜李侍郎

東之得西京留臺

賤子何為者，栖栖今二毛。滄波浮片葉，大塊載秋毫。利物物何補，營身身已勞。羨君遺世網，脫屣一何高。

和始平公貽一二賓僚

儒冠藹藹從平津，東閣由來盛衆賓。終始何嘗忘教育，高卑曾不間疎親。共陪尊俎無虛日，空喜谿山得主人。

白雪屢歌殊未和自知羞愧後車塵

何濟川有書見貽云以親老須守近郡以便祿
養不得如光在主人幕下因以詩答

千騎駉駉簇畫軸高旌大蓋五驂騶齋中酒美連翩醉
湖上花繁爛漫遊雞犬相聞通故里旨甘不絕奉晨羞
只應朝夕平津閣得向君前立勝籌

野菊

野菊未嘗種秋花何處來羞隨衆草沒故犯蚤霜開寒

蝶舞不去夜蠶吟更哀幽人自移席小摘泛清杯

秋夜

城上調秋角煙間發暝鐘風枝搖宿鳥霜草覆寒蠶久
負觀書樂端愁束帶恭暫因羣吏散還得遂幽慵

秋雨蕭條聞宗聖按伎應之飲酒詩呈宜甫

寒風細雨未晴天密似輕塵薄似煙一室獨吟圖史亂
四鄰高會綺羅鮮鴈飛斜柱絃隨指蟹薦新螯酒滿船
自笑不歌仍不飲昏昏只解枕肱眠

和聶之美重遊東郡

躍馬津亭未幾何，宦遊容易十年過。
飄飄空似隨流梗，寂寞猶為挂壁梭。
西嶺應餘當日翠，南湖真減幾分波。
之美云南浦比舊水涸過半 輸君尚得飛征蓋，重向春園聽舊歌。

龍女祠後塘，自生荷花數枝與史誠之更相酬和

清江向晚采蓮稀，獨倚蘭舟久未歸。
目斷可堪人不至，斜風細雨濕羅衣。

素舸朱篷青竹篙
櫂歌風散近還遙
斜陽借問歸何處
家住水邨郎姓蕭

寒食許昌道中寄幕府諸君

原上煙蕪澹復濃
寂寥佳節思無窮
竹林近水半邊綠
桃樹連邨一片紅
盡日解鞍山店雨
晚天回首酒旗風
遙知幕府清明飲
應笑馳驅羈旅中

和何濟川漢州西湖雜詠

藥圃

三蜀膏腴地偏於藥物宜小畦千種聚春雨一番滋山
相慙多識桐君未偏知他年似胡廣養壽復扶衰

竹塢

二何跡相繼竹塢日陰森

濟川詩注云前守何修撰
不伐西湖竹予亦遵之欲

識養民意先觀愛物心低垂尊俎冷密映管絃深勿怪
湖光少年來碧影侵

玉徽亭

房公昔漂泊置酒此鳴琴人事有憂樂山光無古今風

流俱寂寞結構尚蕭森松竹含虛籟猶疑絃上音

清燕亭

波澄蔭羣木永日湛清華碧篠靜秋色白蘋低晚花松
聲工醒酒泉味最便茶外事付丞掾無妨風景嘉

坐船

使君張阜蓋高宴碧湖心苒弱牽菱蔓夷猶泊柳陰晚
風侵坐冷春浪沒篙深倒載歸何晚波間夕照沈

寓泊鄭圃寄獻昌言舍人

金天月八
卷五
旅食緇衣館飄蓬恍自迷樹橫寒霧遠山隱古原低愁
暮空庭雀驚晨別墅雞故人何處在依約玉繩西

奉和始平公憶東平

相印東臨汶水陽兩看春葉與秋霜登山置酒延鄒湛
上馬回鞭問葛強谿竹低垂寒滴翠露荷相倚淨交香
宵衣深念長城固肯得從容傲醉鄉

感春

積草滿春庭衡門永晝扃波頭何事白柳眼為誰青榮

落浮雲度悲歡熟醉醒繁華非我物隨意任飄零

謁三門禹祠

巖巖青崖裂喧豗白浪豪客舟浮木葉生理脫鴻毛柏

映孤峯短

水際孤峯甚細而高上有小柏者舊相傳不知幾何年矣而止長尺餘人莫測其理銘

書絕壁高

唐太宗刻銘砥柱之陰魏鄭公撰字幾盈尺殘缺僅可讀河師不耕織容

易戲風濤

河北道中作

綠柳陰中白浪花河邊日日暗風沙解鞍縱馬悄無事

隱几看書隨處家

夜發長垣

長塗暑氣劇永日卧郵亭晝伏如牆鼠宵行似野螢歇
鞍沙月白拂面柳風醒歷歷瞻雲漢誰為二使星

和景仁瓊林席上偶成

時康與禹玉景仁次道
之子同時登科在席

念昔瓊林賜宴歸綵衣綠綬正相宜將雛雖復慰心喜
負米翻成觸目悲殿角花猶紅勝火尊前髮自白如絲
桂林衰朽何須恨幸有新枝續舊枝

和吳仲庶寄吳瑛比部安道之子壯年致仕歸

隱蘄春

負米承親願已賒

遭母憂服除遂致仕

恥隨雞鶩啄泥沙一朝投

絃真高士萬卷藏書舊世家齒髮未衰非藥物山林不
返為雲霞龐眉尚有郎潛者徇祿憂生直可嗟

別長安

暫來還復去夢裏到長安可惜終南色臨行子細看

酬終南閭諫議

詢字見寄

齒衰心力耗，撫分乞西臺。
微祿供多病，閒官養不才。
敝廬容嘯傲，清洛伴歸來。
故友猶相念，寒光生死灰。

秋夜

浮雲一消散，星斗粲長天。
浩露灑翠柏，清香生白蓮。
體涼猶衣葛，耳靜已無蟬。
坐久羣動息，秋空唯寂然。

和河陽王宣徽

拱辰字君貺

九日平嵩閣宴集

九日英僚集，千秋勝賞同。
飛橋貫河渚，危閣壓霜風。
金散黃花泛，雷驚疊鼓通。
百峯高鳥外，萬里寸眸中。
檻底

臨丹葉杯中倒碧
嵩來雲低拂座去
鴈遠沈空吹帽陪
遊阻搖旌結想叢
風流免湮滅鄒湛
倚羊公

柏梯寺

鑿石開蹊峻登崖
置閣危笑譚空谷
應步武白雲隨衆
壑如翻浪鄰州若
布棋何當遂棲隱
身世兩相遺

重過華下

昔辭蓮幕去三十四
炎涼舊物三峯雪
新悲一鑷霜雲
低秦野闊木落渭
川長欲問當時事
無人獨歎傷

靜夜

午夜空齋四悄然清寒透骨不成眠
秋風故揭疎簾起
正漏月華來枕前

寄題陟屺寺

鄭南峯下寺前軒反景分明見渭川
為報十年容易別
於今愁悴不如先

鴈歸

亦知南國稻粱肥水滿春江努力歸
聞道楚人繒繳細

平沙短草盡藏機

和邵堯夫年老逢春

年老逢春春莫咤
朱顏不肯似春回
酒因多病無心醉
花不解愁隨意開
荒徑倦遊從碧草
空庭慵埽自蒼苔
相逢譚笑猶能在
坐待牽車陌上來

和范景仁謝寄西遊行記

八水三川路渺茫
翠微深處白雲鄉
目眇嬾拭如松液
領髮頻抓似栗房
林壑不嫌無用物
形骸難入少年場

綠苔躡蔓知多少千里歸來屐齒蒼

獨步至洛濱二首

拜表歸來抵寺居解鞍縱馬罷傳呼紫衣金帶盡脫去
便是林間一野夫

草軟波清沙徑微手攜筇竹著深衣白鷗不信忘機久
見我猶穿岸柳飛

和邵堯夫安樂窩中職事吟

靈臺無事日休休安樂由來不外求細雨寒風宜獨坐

暖天佳景即閒遊松篁亦足開青眼桃李何妨插白頭
我以著書為職業為君偷暇上高樓

遊山呈范景仁

景仁年五十三致仕

我祿多龔舍

舍為吏不過六百石輒自免去

君年少孔戣

戣七十致仕韓愈留之

道心閒始見世路老方知山水不相厭風光難豫期
嬉遊不可緩花卉即離枝

秋雨新霽遊水北馬上偶成

秋色與秋聲蕭然滿洛城未霜林葉赤新雨野風清水

氣侵肌冷嵐光刮眼明誰云景如畫但恐畫難成

和六日四老會

萸房迎令節菊蕊入芳筵華燭初長夜清霜未冷天悲
風咽橫吹驟雨送繁絃聊附鄒枚客敢希園綺賢

和君貺題潞公東莊

嵩峯遠疊千重雪伊浦低臨一片天百頃平皋連別館
兩行疎柳拂清泉國須柱石扶丕構人待樓航濟巨川
蕭相方如左右手且於窮僻置閒田

和開叔

寒梅犯雪榮大隱久專名異種生江渚何年到洛城

洛中

雖有梅開花常晚獨大隱梅最先開相傳好事者自江南移來今數十年矣色如虛室白香似主人清嚮使吳兒見不思菰菜羹

閒居

故人通貴絕相過門外真堪置雀羅我已幽慵僮更嬾
雨來春草一番多

酬仲通初提舉崇福宮見寄

富壽安民舊學違符移擁筆素心非青雲有路那足顧
白髮滿頭胡不歸永日杜門無俗客臨風隱几得天機
西山爽氣秋應好恨不相從上翠微

野軒

黃雞白酒田間樂藜杖葛巾林下風更若食芹仍暴背
野懷併在一軒中

六月十八日夜大暑

老柳蝸蟬噪荒庭熠燿流人情正苦暑物態已驚秋月

下濯寒水風前梳白頭如何夜半客東帶謁公侯

閒居

閒居雖懶放未得便無營伐木添山色穿渠擘水聲經
霜收芋美帶雨接花成前日鄰翁至柴門埽葉迎

和明叔遊白龍溪

溪深荒徑微尋勝不知疲寒月影隨馬曉風冰滿髭行
歌被褐叟聚戲拾薪兒野外饒真趣令人懷抱夷

晚春病起呈擇之治臣

風日正和柔身輕喜病瘳嬾拋殘蠹簡暖脫敝貂裘值
客開青眼逢花忘白頭家家好春色何處可同遊

次韻和宋復古春日二絕句

雪霜衰鬢拔還生桃李新園長未成五十尚能勝六十
今年又減去年情

東城絲網蹴紅毬北里瓊樓唱石州堪笑迂儒竹齋裏
眼昏逼紙看蠅頭

酬宋叔達

道復古之兄

卜居洛城見寄

離羣四十一春風縱有相逢似夢中幸得相逢作鄰舍

但嗟彼此是衰翁漢文前席人將去

復古謫官不日牽復

庾信誅

茅橐未充

來詩云自笑顛狂便歸去並無穿繫買山錢

悵望金隄碧蕪閣杖

藜攜手幾時同

君貺環溪

地勝風埃外門深花竹間波光冷於玉溪勢曲如環滎
路回翔厭華軒嘯詠閒堪羞謝太傅不復到東山

瞑目

瞑目思千古飄然一烘塵山川宛如舊多少未來人

初夏獨遊南園

取醉非無酒忘憂亦有花暫來疑是客歸去不成家

獨樂園新春

春風與汝不相關何事潛來入我園曲沼揉藍通底綠
新梅翦綵壓枝繁短莎乍見殊堪喜鳴鳥初聞未覺喧
憑仗東君徐按轡旋添花卉伴芳尊

景仁書云去冬因酒病耳病牙遂不入洛以詩

寄呈

許昌攜手盡時英
况復新開甲第成
醉裏都將春作達
老來不向酒藏情
齒疎無廢銜杯趣
耳病猶分度曲聲
舊友昔遊渾忘卻
可憐寂寂洛陽城

和邵興宗秋夜學舍宿直

直舍逍遙度清夜
暫投逢掖解儒冠
高樓影背星河轉
疎竹氣兼風露寒
籬下黃花新蕊亂
門邊碧柳舊株殘
折腰把板今無有
勿似陶潛遂棄官

和之美河西列岫亭

秋山對疎牖，羈客倦登臨。
雨後嵐光活，晴初落照深。
素波明別浦，赤葉照衰林。
佇目寂無語，何人知此心。

亭皋資遠矚，秋思浩無涯。
鴈唼牽菱蔓，童歌出荻花。
龍荒猶叱犢，枝暗稍棲鴉。
煙靄藏東渚，憑軒莫望家。

釣魚

野釣披榛竹，無人知往來。
高空飛不下，鷗鳥已相猜。

會不疑家席上紀實

召客客俱來賞花花正開寒暄方得所風雨不相催
席上柳飛雪門前車殷雷主人意仍厚安得不徘徊

和子駿洛中書事

西都自古繁華地冠蓋優游萃五方比戶清風人種竹
滿川濃綠土宜桑鑿龍山斷開天闕導洛波回載羽觴
況有耆英詩酒樂問君何處不如唐

逍遙

結髮讀經史疲精非一朝於今成濩落所幸得逍遙不

躑狂心息難平客氣消巢林易為足竊敢比鷦鷯

閒思宇宙內何物不由天定分不移易勞心徒棄捐鵬
飛九萬里松壽一千年斤鷄與朝菌道逢亦自然

和子華應天院行香歸過洛川

印節傳呼洛北還府庭無訟不妨閒度橋寒色侵春服
按轡晴光露曉山香穗徘徊凝廣殿花籃繁會滿通闌
自知白雪高難和忍愧誰能寄我顏

和伯常自郢州見寄

西郊去歲揖行人柳暗花濃又一春坐想高風清入骨

沈吟佳句健生神潺湲杳靄煙波右

來書云郢西雨多潺湲杳靄

散

誕道逢興趣新應笑洛陽車馬道緇衣未免化紅塵

陪致政開府太師留守相公致政內翰燕集輒

歌歌盛美為三公壽皆用公字為韻

獨佐成康世高年有畢公神心降維嶽龜兆告非熊黃

閣遵成範太常書茂功歸來保眉壽恩禮享優隆

右太師

東閣延髦士西都守別宮不忘如衛武難老似僖公位

貌今雖遠官僚舊忝同開懷盡卮酒足以厚時風

右相公

眉似高僧秀顏如童子紅忠純汲長孺高潔夏黃公矯

矯遼東鶴冥冥塞北鴻自誇新酒量想像百分空

右內翰

和吳朝議

執中字幾聖

同年謝光與景仁同年見過

結綬東堂同發策白頭相值益相親卻思景祐無多日

共見元豐有幾人天下高名歸廣受

二公皆致仕

古來交道

重雷陳謝公身老才方壯落筆成章字字新

伏蒙留守相公賜示陪太師潞公東田宴集詩

輒敢屬和

舞雩新雨浹公田水滿東溪上下天
行逕乍迂初見筍
浮舟正好未生蓮
絃收裂帛胡琴闌
袖結清風楚舞妍
相國火城光滿路
夜歸不假玉蟾圓

華嚴真師以詩見貺聊成二章紀其趣尚

知足隨緣處處安
一身溫飽不為難
禪房窄小纔容榻
此外從他世界寬

素髮青眸七十餘
未嘗遊學只安居
旁無几杖身輕健

應為心閒得自如

和南園真率會見贈

白頭難入少年場
林下相招莫笑狂
綠篠影侵碁局暗
黃梅花漬酒卮香
任真自愧穀羞薄
假寐初便枕簟涼
酬應詩豪困牽率
從來嬾放似嵇康

送峽州陳廉祕丞三首

宜都賢太守
治跡古人齊
虎負衆子去
鳳環羣鳥棲
行增潁川秩
別降武都泥
正恐還朝速
春林未子規

郡府猿聲外旌旗烏道邊樓高出楚塞煙霽識巴船襦
袴嗟來暮簪紳惜外遷皇仁矜遠俗非謂意疎賢

地險三巴口江流百折蟠騶珂通峽響門戟照秋寒翠
壁虎牙石素花狼尾灘孫劉置柵處細為寫圖看

送華亭沈主簿

執袂青門道蕭蕭馬欲東暮雲零落翠遠樹淺深紅楚
澤吟聲裏吳山醉眼中相思杳何許野鶴唳高風

送鄭推官戲赴邠州二首

形便郊公國旌旗擁將壇秦雲低落日塞樹怯春寒草
檄無留思投壺不廢歡還應笑黃卷寂寂守儒官

百榼行春樂千弓從獵豪苦吟邊月冷飛鏑野風高竒
策鞭殊俗長纓繫不毛輸君躍馬貴一等著青袍

送何萬下第歸蜀

十上終無就才高定復論清時守儒術白首在丘園遠
樹隱殘日孤煙生暮邨揚鞭萬里去幾許不銷魂

送王殿丞

景陽

知眉山縣二首

先公與祕閣府
君相繼為利州

路轉運使子與
眉山同年登第

疇昔侍嚴親俱為綵服人遊蘭已多益得桂復同春風
樹悲懽異萍波聚散頻峽中盡遺事何處不霑巾

君行杳何許萬里蜀雲西野色春期近林煙曉意迷天
藏巴峽小星逼劒關低莫使鄉愁亂咬咬信子規

送僧聰歸蜀

翠柏老精舍紅塵倦帝城千山一錫遠萬里片雲輕江
棧紆還直天星縱復橫聽猿應更喜還是故鄉聲

送王彥臣

字伯逢

同年通判亳州

先朝御六飛親謁瀨鄉祠
牛酒當時惠衣冠
此日思仙蹤
丹有竈天瑞
檜生枝聖主憐
耆舊題輿得吏師

送張祕校

牧

知分寧

獻臣父

百里大夫官不輕
莫嗟頂上髮垂星
人生穀祿偏宜晚
世路艱難不厭經
數曲秋江縈縣白
幾峯霽色入簾青
于公嚮日多陰德
已有鵷雛在帝庭

送計先輩

泰符

尉宗城

紅塵久帝城高價動公卿竹柏寒方茂驂騑老更成冰
霜驅馬瘦書劍束裝輕丞相虛東閣逢知倒屣迎

送張都官

肅字子莊

江南東路提刑

得前字

楚俗號難治司刑尤擇賢危疑片言決舒慘一方專松
不彫寒色絲曾斷直絃清風過江外應在下車前

送楊祕丞

秉

通判揚州

苦聞小杜說揚都當昔豪華今在無江勢橫來控南楚
地形前不瞰東吳萬商落日船交尾一市春風酒並壚

得意莫忘京國友
跼塵衝雪奉朝趨

送皇甫寺丞

穆

知藍田縣

南山三輔劇百里古諸侯
誰為絃歌小不分宵旰憂
煙橫輔川暝雲照武關秋
安得無羈束從君一縱遊

送張景淳知邵武軍

閩嶺官何在東南千里遙
他離傷草草會合更迢迢
隋岸微吹絮吳江欲上潮
肯無同舍念回首弭輕橈

送王伯初通判婺州

煜爚屏星駕迢迢
婺女區嵐光晴向背
溪溜暖縈紆萬室
鳴機杼千艘隘舶艫
若逢耆舊問能說
隱侯無

送雲卿知衛州

汗簡成新令
褰帷刺劇州
韋平家法在
呂杜治聲優
野竹交淇水
秋瓜蔓帝丘
三年歸奉計
肯顧石渠遊

送聶祕丞之美宰桐城

七載一相值
恍然如路衢
形骸漸枯槁
志業轉荒蕪
往事雲過眼
新悲雪染鬚
明朝又分首
上馬即重湖

送李侍郎東之西京留臺

先公勲烈盛鹽梅清白仍聞世濟才華省拂衣辭簿領
長衢回首謝塵埃嵩峯排霧依稀出洛水迎人迤邐來
寄語馬前頭白吏何殊昔日李西臺

郭氏園送張仲通出刺棣州

得朝字

名園送嘉客冠蓋去傾朝小雨塵微斂餘寒酒易消鴈
歸春近塞日上海生潮北道平如掌東風五馬驕

送賢良陳著作

舜俞

簽書壽州判官

海隅方萬里豪雋幾何人
百汰求才盡三熏得士新
聲華四方聳器業一朝伸
他日蒼生望非徒澤壽春

送吳仲庶知江寧

江南佳麗地人物自風流
青骨靈祠在黃旗王氣收
衣冠餘舊俗歌頌樂賢侯
正恐還朝速江山未徧遊

送劉仲通赴京師

聖朝方考牧蕃育寄才能
屢別良可歎閒遊不復曾
行塵遵洛汭朝騎對觚稜
灋上秋臺迴歸來正好登

參政正肅吳公育挽詩

皇家延茂異，鶚立迴無倫。
高議誰能奪，英才自有真。
騶寧受繫冰，鑑不棲塵。
試為咨清論，風流第幾人。

翰林彭學士乘挽辭

祖奠垂將撤，笳簫儼欲行。
野寒嘶故馬，樹轉出新旌。
泉路幽無底，魚燈暖不明。
如何齋美志，鬱鬱向佳城。

侍讀張學士環哀辭

喜愠與榮枯，居之悉晏如。
稍閒多執筆，至老不拋書。
常


愧無能極曾霑清論餘秋風郭門外雨泣望喪車

張元常挽辭

為吏文無害臨民政不苛渾金生自美古井澹無波方
喜風鵬舉旋聞隙駟過善人宜壽考報施定如何

邵堯夫先生哀辭

叔藿一簞樂蒿萊三畝寬蒲輪不能起甕牖有餘安高
節去圭角久要敦歲寒今朝郊外客誰免涕洟瀾



宋百家詩存卷五